

**共同經課-1 約書亞記二十四章一節~三節，十四節~二十五節**

1 約書亞聚集以色列眾支派到 tī 示劍，召以色列 ê 長老，kap in ê 族長、審判官，以及官長來；in 就 khiā tī 上帝 ê 面前。 2 約書亞 kā 眾百姓講：耶和華以色列 ê 上帝 án-ni 講：在早 lín ê 列祖，就是亞伯拉罕 ê 老父，Ná-hók ê 老父，Tha-láh，tiàm tī 大河 hit-pêng，服事別 ê 上帝。 3 我取 lín ê 祖亞伯拉罕 tùi 大河 hit-pêng chhoā 伊遍行迦南全地；koh hō伊 ê kiáⁿ 孫 choē-choē，用以撒賞賜伊；14 Taⁿ lín tiòh 敬畏耶和華，誠心實意服事伊，將 lín 列祖 tī 大河 hit-pêng kap tī 埃及所服事 ê 上帝除去，來服事耶和華。 15 Nā 是 lín 掠服事耶和華做 m̄好，今 á 日 lín tiòh 揀 lín 所 beh 服事 ê；看是 lín 列祖 tī 大河 hit-pêng 所服事 hiah-ê 上帝，á 是 lín 所 khiā 起 in ê 地，A-mô-lī 人，hiah-ê 上帝 ah。論到我 kap 我 ê 家，阮決斷 beh 服事耶和華。 16 百姓應講，阮決斷無意思 beh 棄 sak 耶和華去服事別 ê 上帝。 17 因為耶和華阮 ê 上帝 bat chhoā 阮 kap 阮 ê 列祖 tùi 埃及地做奴才 ê 家出來，tī 阮 ê 目睷前行 hiah-ê 大 ê 神蹟，tī 阮所行一切 ê 路，所經過 ê tak 國，lóng 有保護阮。 18 耶和華也 tī 阮 ê 面前趕出 lóng 總 ê 百姓，趕出 khiā 起 chit-ê 所在 ê A-mô-lī 人；所以阮也 beh 服事耶和華，因為祂是阮 ê 上帝。 19 約書亞對百姓講：Lín boē 會服事耶和華，因為伊是聖 ê 上帝，決斷無容允用別 ê 上帝匹配伊，無 beh 赦免 lín ê 過失，lín ê 罪惡。 20 Lín 若離開耶和華去服事外邦 ê 上帝，耶和華 tī 降福氣 hō lín 了後，beh oát-tng 來降災厄 hō lín，滅無 lín。 21 百姓 in 約書亞講：無 lah；阮定 tiòh beh 服事耶和華。 22 約書亞對百姓講：Lín 揀耶和華 beh 服事伊，lín 家已做 lín ê 干證。In 應講，好，阮做干證。 23 約書亞講：Lín taⁿ tiòh 除去 lín 中間所有外邦 ê 上帝，hō lín 專心歸向耶和華以色列 ê 上帝。 24 百姓 in 約書亞講：阮 beh 服事耶和華阮 ê 上帝，聽 thàn 伊 ê 話。 25 Hit 日約書亞就 kap 百姓立約，tī 示劍 kā in 設立律例法度。

**共同經課-2 詩篇七十八篇一節~七節 (A-sat 教示 ê 詩。)**

1 我 ê 百姓 ah，lín tiòh 聽我 ê 教示，Àⁿ 耳孔聽我 ê 嘴 ê 話。 2 我 beh 開嘴設譬喻，我 beh 講出古早隱密 ê 話， 3 就是阮所聽見，所知 ê；亦是阮 ê 祖公傳 hō阮 ê。 4 阮無 beh 將 chiah-ê 事對 in ê kiáⁿ 孫隱瞞；Beh 將耶和華 ê 名聲 kap 伊 ê 權能，以及伊所行奇妙 ê 事，傳 hō後世代。 5 因為伊 tī 雅各立干證 ê 話，tī 以色列設律法；是伊命令咱 ê 祖公 ê，thang 傳 hō in ê kiáⁿ 孫。 6 Hō後代，就是得 beh 出世 ê kiáⁿ 孫知；In 亦 beh 起來傳 hō in ê kiáⁿ 孫； 7 Hō in ê òng 望在 tī 上帝，無 boē 記得全能 ê ê 所做，是 beh 遵守伊 ê 誠命。

**共同經課-3 帖撒羅尼迦前書四章十三節~十八節**

13 兄弟 ah，論到 teh 暈 ê 人，阮 m̄ ài lín m̄知，免得 lín 憂悶親像 hiah-ê 無 òng 望 ê 人一樣。 14 因為咱若信耶穌有死有 koh 活，就屬耶穌來暈 ê 人，上帝也 beh án-ni chhoā in kap 耶穌 saⁿ-kap 來。 15 因為阮奉主 ê 命令，用 chit-ê kā lín 講，就是主 koh 來 ê 時，咱 chiah-ê iáu 活 teh ê 人，boē 會事先 hiah-ê teh 暈 ê 人。 16 因為主 beh 本身 tùi 天落來，有大喉叫，有至大天使 ê 聲，也有上帝 ê 哨角，就 hiah-ê 屬基督已經死 ê 人 beh 事先起來。 17 後來咱 iáu 活 teh ê 人 beh kap in 受接納 tī 雲內，入空中迎接主；án-ni 咱就永遠 kap 主 saⁿ-kap tī-teh。 18 所以 tiòh 用 chiah-ê 話相安慰。

**共同經課-4 馬太福音二十五章一節~十三節**

1 Hit 時天國 beh 比並十個在室女，kiáh in ê 燈，出去迎接新 kiáⁿ 婿。 2 其中五個蠢 ê，五個知識 ê。 3 蠢 ê kiáh in ê 燈，無另外帶油。 4 獨獨知識 ê kiáh in ê 燈另外帶油 tī in ê 器具內。 5 新 kiáⁿ 婿延 chhiàn，就 lóng tuh-ka-chē teh 暈。 6 半暝，有大聲叫講，新 kiáⁿ 婿來 lah；lín 出來 chih 伊。 7 Hit 時 chiah-ê 在室女 lóng 起來，修整 in ê 燈。 8 蠢 ê kā 知識 ê 講，請將 lín ê 油 pun 阮，因為阮 ê 燈 beh hoa lah。 9 知識 ê 應講，驚了 lín 阮 lóng 無夠；khah 好去 tùi 賣 ê 人家已買。 10 去買 ê 時，新 kiáⁿ 婿到，hiah-ê 便 ê kap 伊入婚姻 ê 筵桌；門就關。 11 然後其餘 ê 在室女亦來，講，主 ah，主 ah，kā 阮開。 12 若是伊應講，我實在 kā lín 講，我 m̄-bat lín。 13 所以 tiòh tiuⁿ-tí，因為 lín m̄ 知 hit-ê 日，hit-ê 時。